

ა(ა)იპ „თბილისის საბავშვო ბაგა-ბაღების მართვის სააგენტო“-ს მიერ გამოცხადებული ელექტრონული შესყიდვის პროცედურების (GEO) შედეგად მიღებული სატენდერო წინადადების შერჩევა/შეფასების წესი

1. შესყიდვის ელექტრონული პროცედურისათვის სტატუსის „წინადადებების მიღება დასრულებულია“ მინიჭებიდან არაუგვიანეს 5 სამუშაო დღის ვადაში, შესყიდვის ელექტრონული პროცედურის ჩამტარებელმა კომისიამ (შემდგომში „კომისია“) უნდა იმსჯელოს, შეესაბამება თუ არა ყველაზე დაბალი წინადადების ფასის მქონე პრეტენდენტის შესყიდვის ელექტრონულ პროცედურაში მონაწილეობის გარანტია (როგორც ერთიან ელექტრონულ სისტემაში ატვირთული, ასევე შესყიდვის ელექტრონული პროცედურის ჩამტარებელ ორგანიზაციაში წარმოდგენილი) და ტექნიკური დოკუმენტაცია შესყიდვის ელექტრონული პროცედურის დოკუმენტაციის პირობებს. ამ პუნქტში მითითებული ვადა შესაძლებელია გაგრძელდეს არაუმეტეს 5 სამუშაო დღით, მხოლოდ კომისიის დასაბუთებული გადაწყვეტილებით, რომელშიც მითითებული იქნება სათანადო ობიექტური მიზეზ(ებ)ი.

2. იმ შემთხვევაში, თუ ერთიან ელექტრონულ სისტემაში ტექნიკურ დოკუმენტაციასთან ერთად პრეტენდენტი არ ატვირთავს შესყიდვის ელექტრონულ პროცედურაში მონაწილეობის, დოკუმენტაციის პირობების შესაბამის, გამოუთხოვად, უპირობო საბანკო გარანტიას, შესყიდვის ობიექტის სავარაუდო ღირებულების 1%-ის ოდენობით (ბენეფიციარად განსაზღვრული უნდა იქნეს ა(ა)იპ „თბილისის საბავშვო ბაგა-ბაღების მართვის სააგენტო“) პრეტენდენტი ექვემდებარება დისკვალიფიკაციას ამ წესის 20-ე პუნქტის „ბ“ ქვეპუნქტის საფუძველზე.

3. იმ შემთხვევაში, თუ შესყიდვის ელექტრონული პროცედურისათვის „გამარჯვებული გამოვლენილია“ სტატუსის მინიჭებიდან არაუგვიანეს 2 სამუშაო დღის ვადაში პრეტენდენტი შესყიდვის ელექტრონული პროცედურის განმახორციელებელ ორგანიზაციაში არ წარმოადგენს შესყიდვის ელექტრონულ პროცედურაში მონაწილეობის ერთიან ელექტრონულ სისტემაში ატვირთული გარანტიის დედანს, პრეტენდენტი ექვემდებარება დისკვალიფიკაციას 20-ე პუნქტის „ბ“ ქვეპუნქტის საფუძველზე.

4. იმ შემთხვევაში, თუ პრეტენდენტის ტექნიკური დოკუმენტაცია არ შეესაბამება შესყიდვის ელექტრონული პროცედურის ტექნიკურ პირობებს, პრეტენდენტი ექვემდებარება დისკვალიფიკაციას ამ წესის 20-ე პუნქტის „ბ“ ქვეპუნქტის საფუძველზე, გარდა მე-5 და მე-6 პუნქტებით გათვალისწინებული შემთხვევებისა.

5. კომისია არ ახდენს პრეტენდენტის დისკვალიფიკაციას, თუ მისი ტექნიკური დოკუმენტაცია არ შეიცავს ისეთ მონაცემ(ებ)ს ან/და შეიცავს ისეთ უზუსტობას/უზუსტობებს, რომლის/რომელთა წარდგენა ან/და დაზუსტება არ გამოიწვევს ტექნიკური დოკუმენტაციის არსებით ცვლილებას ან/და არ გაზრდის წინადადების ფასს. ამასთან, დაზუსტებას არ ექვემდებარება ტექნიკური დოკუმენტაცია, თუ სატენდერო დოკუმენტაციის მოთხოვნ(ებ)ის შესაბამისად, არ არის წარდგენილი ან მასში არ არის მითითებული ინფორმაცია შესყიდვის ობიექტის სასაქონლო ნიშნის, პატენტის, მოდელის, წარმოშობის წყაროს ან მწარმოებლის შესახებ, ასევე არ არის ან განუფასებლადაა წარდგენილი ხარჯთაღრიცხვა (განფასება/ფასების ცხრილი).

6. თუ სისტემაში მთლიანი ტექნიკური დოკუმენტაცია ატვირთულია ხარვეზის მქონე ფაილის სახით (რომელიც არ იკითხება), კომისიას უფლება არ აქვს, პრეტენდენტს მიმართოს ტექნიკური დოკუმენტაციის დაზუსტების მოთხოვნით, გარდა იმ შემთხვევისა, როდესაც ხარვეზიანია ტექნიკური დოკუმენტაციის ისეთი ნაწილი, რომლის წარმოდგენა ან/და დაზუსტება არ გამოიწვევს ტექნიკური დოკუმენტაციის არსებით ცვლილებას ან/და არ გაზრდის წინადადების ფასს.

7. მე-5 და მე-6 პუნქტებით გათვალისწინებულ შემთხვევებში, კომისია მიმართავს პრეტენდენტს ტექნიკური დოკუმენტაციის დაზუსტების მოთხოვნით, რისთვისაც განუსაზღვრავს მას გონივრულ, მაგრამ არაუმეტეს 3 სამუშაო დღის ვადას. იმ შემთხვევაში, თუ წარმოსადგენი დოკუმენტისათვის განსაზღვრულია ნორმატიული აქტით დადგენილი ვადა, პრეტენდენტს შესაძლებელია ვადა განესაზღვროს 3 სამუშაო დღეზე მეტი, მაგრამ არაუმეტეს 7 სამუშაო დღისა. დაზუსტებისას კომისია ვალდებულია, ზუსტად მიუთითოს პრეტენდენტს დასაზუსტებელი პოზიციის/ნაწილის შესახებ. დაზუსტებული ტექნიკური დოკუმენტაცია კომისიას წარედგინება სისტემის მეშვეობით.

8. ტექნიკური დოკუმენტაციის დაზუსტების მოთხოვნა დასაშვებია მხოლოდ შესყიდვის ელექტრონული პროცედურისათვის „გამარჯვებული გამოვლენილია“ სტატუსის მინიჭებამდე.

9. კომისია დაზუსტებული ტექნიკური დოკუმენტაციის შესყიდვის ელექტრონული პროცედურის პირობებთან შესაბამისობას განიხილავს ტექნიკური დოკუმენტაციის დაზუსტებისთვის განსაზღვრული ვადის გასვლიდან არაუგვიანეს 3 სამუშაო დღეში, რომელიც შესაძლებელია გაგრძელდეს არაუმეტეს 2 სამუშაო დღით, მხოლოდ კომისიის დასაბუთებული გადაწყვეტილებით, რომელშიც მითითებული იქნება სათანადო ობიექტური მიზეზ(ებ)ი.

10. პრეტენდენტი, რომელიც არ დააზუსტებს ტექნიკურ დოკუმენტაციას დადგენილ ვადაში, არასრულყოფილად დააზუსტებს ან/და დაზუსტების შედეგად არსებითად შეცვლის მას, ექვემდებარება დისკვალიფიკაციას ამ წესის 20-ე პუნქტის „გ“ ქვეპუნქტის საფუძველზე.

11. დაუშვებელია ტექნიკური დოკუმენტაციის განმეორებით დაზუსტება.

12. ხარჯთაღრიცხვის (განფასების) დაზუსტება დასაშვებია:

ა) ტექნიკური დოკუმენტაციის დაზუსტების მოთხოვნასთან ერთად, იმავე ვადაში – თუ დაზუსტებას საჭიროებს ტექნიკური დოკუმენტაცია. ასეთ შემთხვევაში, ხარჯთაღრიცხვის (განფასების) დადგენილ ვადაში დაუზუსტებლობა, არასრულყოფილად დაზუსტება ან/და არსებითად შეცვლა გამოიწვევს პრეტენდენტის დისკვალიფიკაციას ამ წესის 20-ე პუნქტის „გ“ ქვეპუნქტის საფუძველზე;

ბ) ფასწარმოქმნის ადეკვატურობის დამადასტურებელი დოკუმენტ(ებ)ის წარდგენის მოთხოვნასთან ერთად, იმავე ვადაში – თუ ტექნიკური დოკუმენტაცია არ საჭიროებს დაზუსტებას და შესყიდვის ელექტრონულ პროცედურაში გათვალისწინებულია ფასწარმოქმნის ადეკვატურობის დასაბუთების წარმოდგენის ვალდებულება. ასეთ შემთხვევაში, ხარჯთაღრიცხვის (განფასების) დადგენილ ვადაში დაუზუსტებლობა, არასრულყოფილად დაზუსტება ან/და არსებითად შეცვლა გამოიწვევს პრეტენდენტის დისკვალიფიკაციას ამ წესის 20-ე პუნქტის „დ“ ქვეპუნქტის საფუძველზე;

გ) ხელშეკრულების დასადებად მიწვევასთან ერთად – თუ ტექნიკური დოკუმენტაცია არ საჭიროებს დაზუსტებას და შესყიდვის ელექტრონულ პროცედურაში არ არის საჭირო ფასწარმოქმნის ადეკვატურობის დამადასტურებელი დოკუმენტ(ებ)ის წარდგენა. საქონლის მიწოდების ხარჯთაღრიცხვის (განფასების) დაზუსტებისათვის დგინდება გონივრული ვადა, მაგრამ არაუმეტეს 3 სამუშაო დღე, რომელიც ითვლება ხელშეკრულების დასადებად განსაზღვრულ ვადაში. ასეთ შემთხვევაში, ხარჯთაღრიცხვის დადგენილ ვადაში დაუზუსტებლობა, არასრულყოფილად დაზუსტება ან/და არსებითად შეცვლა გამოიწვევს პრეტენდენტის დისკვალიფიკაციას ამ წესის 20-ე პუნქტის „ე“ ქვეპუნქტის საფუძველზე.

13. ამ წესის მე-12 პუნქტის „ა“-„ბ“ ქვეპუნქტებით გათვალისწინებულ შემთხვევებში, დაზუსტებული ხარჯთაღრიცხვა (განფასება) მოწმდება, შესაბამისად, დაზუსტებული ტექნიკური დოკუმენტაციის ან ფასწარმოქმნის ადეკვატურობის დამადასტურებელი დოკუმენტ(ებ)ის, შეფასებასთან ერთად, ხოლო ამავე პუნქტის „გ“ ქვეპუნქტით გათვალისწინებულ შემთხვევაში – ხელშეკრულების დადებამდე.

14. იმ შემთხვევაში, თუ შესყიდვის ელექტრონული პროცედურაში ყველაზე დაბალი ფასის წინადადების მქონე პრეტენდენტის მიერ სისტემაში დაფიქსირებული საბოლოო ფასი 20 %-ით ან მეტით დაბალია შესყიდვის ობიექტის სავარაუდო ღირებულებაზე, პრეტენდენტს მოეთხოვება ფასწარმოქმნის ადეკვატურობის დასაბუთება, რაზეც პრეტენდენტის მიერ წარმოდგენილი უნდა იქნას შესყიდვის ობიექტის მიწოდებასთან დაკავშირებით წარმოდგენილი სერტიფიცირებული აუდიტორული სამსახურის/აუდიტორის მიერ გაცემული შესაბამისი დასკვნა ან საშემფასებლო დოკუმენტი, (დასკვნასთან ან საშემფასებლო დოკუმენტთან ერთად, ასევე, წარმოდგენილი უნდა იქნას დასკვნის/საშემფასებლო დოკუმენტის გამცემი პირის შესაბამისი უფლებამოსილების დამადასტურებელი დოკუმენტი) ან ინვოისი ან ანგარიშფაქტურა ან ხელშეკრულება ან საბაჟო დეკლარაცია - ღირებულების მითითებით, ფასწარმოქმნის ადეკვატურობის დასაბუთების წარმოუდგენლობა ან/და უარყოფითი დასკვნის/საშემფასებლო დოკუმენტის წარმოდგენა გამოიწვევს შესაბამისი პრეტენდენტის დისკვალიფიკაციას ამ წესის 20-ე პუნქტის „დ“ ქვეპუნქტის საფუძველზე.

15. კომისია ამ წესის მე-14 პუნქტით გათვალისწინებულ შემთხვევაში ყველაზე დაბალი წინადადების ფასის მქონე პრეტენდენტს მიმართავს ფასწარმოქმნის ადეკვატურობის დამადასტურებელი დოკუმენტ(ებ)ის წარდგენის მოთხოვნით, მხოლოდ შესყიდვის ელექტრონული პროცედურისთვის „გამარჯვებული გამოვლენილია“ სტატუსის მინიჭებამდე.

16. კომისია ფასწარმოქმნის ადეკვატურობის დამადასტურებელი დოკუმენტ(ებ)ის წარსადგენად პრეტენდენტს განუსაზღვრავს 3 სამუშაო დღის ვადას. ამ პუნქტში მითითებული ვადა შესაძლებელია გაგრძელდეს არაუმეტეს 5 სამუშაო დღით, მხოლოდ კომისიის დასაბუთებული გადაწყვეტილებით, რომელშიც მითითებული იქნება სათანადო ობიექტური მიზეზ(ებ)ი.

17. კომისია ფასწარმოქმნის ადეკვატურობის დამადასტურებელი დოკუმენტ(ებ)ის შესყიდვის ელექტრონული პროცედურის პირობებთან შესაბამისობას ადგენს ფასწარმოქმნის ადეკვატურობის დამადასტურებელი დოკუმენტ(ებ)ის წარდგენისთვის განსაზღვრული ვადის გასვლიდან, არაუგვიანეს 3 სამუშაო დღეში, რომელიც შესაძლებელია გაგრძელდეს არაუმეტეს 2 სამუშაო დღით, მხოლოდ კომისიის დასაბუთებული გადაწყვეტილებით, რომელშიც მითითებული იქნება სათანადო ობიექტური მიზეზ(ებ)ი.

18. გამარჯვებულად ითვლება ყველაზე დაბალი წინადადების ფასის მქონე პრეტენდენტი, რომლის ტექნიკური დოკუმენტაცია და შესყიდვის ელექტრონული პროცედურის განმახორციელებელ ორგანიზაციაში წარმოდგენილი შესყიდვის ელექტრონული პროცედურაში მონაწილეობის გარანტია, აგრეთვე, საჭიროების შემთხვევაში, ფასწარმოქმნის ადეკვატურობის დამადასტურებელი დოკუმენტ(ებ)ი შეესაბამება შესყიდვის ელექტრონული პროცედურის პირობებს.

19. გამარჯვებული პრეტენდენტის გამოვლენისთანავე, კომისია ამ პრეტენდენტს შემსყიდველებთან ხელშეკრულების დასადგენად განუსაზღვრავს გონივრულ, მაგრამ არაუმეტეს 5 სამუშაო დღის ვადას.

20. პრეტენდენტი ექვემდებარება დისკვალიფიკაციას, თუ:

- ა) იგი უარს იტყვის შესყიდვის ელექტრონული პროცედურაში წარდგენილ წინადადებაზე;
- ბ) მისი ტექნიკური დოკუმენტაცია არ შეესაბამება შესყიდვის ელექტრონული პროცედურის პირობებს;
- გ) იგი არ დააზუსტებს ტექნიკურ დოკუმენტაციას დადგენილ ვადაში, არასრულყოფილად დააზუსტებს ან/და დაზუსტების შედეგად არსებითად შეცვლის მას;
- დ) იგი არ წარადგენს ფასწარმოქმნის ადეკვატურობის დამადასტურებელ დოკუმენტ(ებ)ს/ნიმუშს დადგენილ ვადაში ან მის მიერ წარდგენილი ფასწარმოქმნის ადეკვატურობის დამადასტურებელი დოკუმენტ(ებ)ი არ შეესაბამება შესყიდვის ელექტრონული პროცედურის პირობებს;
- ე) იგი უარს ამბობს ან სხვაგვარად გამოხატავს უარს ხელშეკრულების დადებაზე;
- ვ) იგი ხელშეკრულების დადების უფლების მოპოვების მიზნით ჩაიდენს არაკეთილსინდისიერ ქმედებას.

21. პრეტენდენტის დისკვალიფიკაციის შესახებ გადაწყვეტილების სისტემაში ატვირთვასთან ერთად, შემსყიდველი ორგანიზაციის უფლებამოსილი წარმომადგენელი სისტემაში უთითებს პრეტენდენტის ამ გადაწყვეტილების შესაბამის დისკვალიფიკაციის სისტემურ საფუძველს.

22. პრეტენდენტს დისკვალიფიკაცია ენიჭება ამ წესის 20-ე პუნქტის მხოლოდ ერთ-ერთი ქვეპუნქტის საფუძველზე.

23. თუ პრეტენდენტი ხელშეკრულების დადების უფლების მოპოვების მიზნით ჩაიდენს არაკეთილსინდისიერ ქმედებას, იგი ექვემდებარება დისკვალიფიკაციას ამ წესის 20-ე პუნქტის „ვ“ ქვეპუნქტის საფუძველზე, მიუხედავად იმისა, იმავდროულად არსებობს თუ არა მისი ამ წესის 20-ე პუნქტით გათვალისწინებული დისკვალიფიკაციის სხვა საფუძველი.

24. ყველაზე დაბალი წინადადების ფასის მქონე პრეტენდენტის დისკვალიფიკაციის შემთხვევაში, კომისია, არაუგვიანეს 5 სამუშაო დღის ვადაში, დადგენილი წესით, აფასებს მომდევნო ყველაზე დაბალი წინადადების ფასის მქონე პრეტენდენტს (არსებობის შემთხვევაში) ან იღებს შესყიდვის ელექტრონული პროცედურის შეწყვეტის შესახებ გადაწყვეტილებას, თუ მომდევნო პრეტენდენტის წინადადების ფასი, ბაზარზე შეცვლილი გარემოებების შედეგად, მნიშვნელოვნად აღემატება ამ შესყიდვის ობიექტის საბაზრო ღირებულებას.

25. პრეტენდენტი ვალდებულია, ერთიან ელექტრონულ სისტემაში ტექნიკურ დოკუმენტაციასთან ერთად ატვირთოს შესყიდვის ელექტრონულ პროცედურაში მონაწილეობის გამოუთხოვადი, უპირობო საბანკო გარანტია, შესყიდვის ობიექტის სავარაუდო ღირებულების 1%-ის ოდენობით (ბენეფიციარად განსაზღვრული უნდა იქნეს ა(ა)იპ „თბილისის საბავშვო ბაგა-ბაღების მართვის სააგენტო“).

ელექტრონულ პროცედურაში მონაწილეობის საბანკო გარანტია გაცემული უნდა იყოს ეროვნული ბანკის მიერ ლიცენზირებული საბანკო დაწესებულების მიერ, რომლის მოქმედების ვადა 30 (ოცდაათი) კალენდარული დღით უნდა აღემატებოდეს წინადადებების მიღების დასრულების ვადას. გარანტია

აგრეთვე უნდა შეიცავდეს შემდეგ პირობებს, რომელ შემთხვევებშიც არ მოხდება პრეტენდენტისთვის გარანტიის დაბრუნება:

- ა) თუ პრეტენდენტი გამარჯვების შემდეგ უარს იტყვის ან სხვაგვარი ქმედებით უარს განაცხადებს შემსყიდველ(ებ)თან ხელშეკრულების გაფორმებაზე;
- ბ) შესყიდვის ელექტრონული პროცედურიდან მოხდება პრეტენდენტის დისკვალიფიკაცია არაკეთილსინდისიერი ქმედების გამო;
- გ) პრეტენდენტი უარს იტყვის შესყიდვის ელექტრონულ პროცედურაში წარდგენილ წინადადებაზე.

26. პრეტენდენტის მიერ წარმოდგენილი შესყიდვის ელექტრონულ პროცედურაში მონაწილეობის 1%-იანი საბანკო გარანტია არ დაექვემდებარება დაბრუნებას ამ წესის 20-ე პუნქტის „ა“, „ე“ და „ვ“ ქვეპუნქტებით გათვალისწინებული საფუძვლით პრეტენდენტის დისკვალიფიკაციის შემთხვევაში.

27. შესყიდვის ელექტრონულ პროცედურაში წინადადების წარდგენისთანავე, პრეტენდენტს სისტემის მეშვეობით ეძლევა საშუალება, მონაწილეობა მიიღოს ელექტრონულ ვაჭრობაში. ძირითადი დროის განმავლობაში პრეტენდენტი უფლებამოსილია, რამდენჯერმე შეამციროს წინადადების ფასი, წინა შეთავაზებულ ფასთან შედარებით არანაკლებ ერთი ბიჯის ოდენობით. შესყიდვის ელექტრონული პროცედურა ჩატარდება სისტემის მეშვეობით და ელექტრონული ვაჭრობა გაიმართება შესყიდვის ჯამურ ღირებულებაზე.

პრეტენდენტი ელექტრონული ვაჭრობისას წინადადების ფასის კლებას ახორციელებს სავარაუდო ღირებულებასთან მიმართებაში.

28. დამატებით რაუნდებში მონაწილეობის უფლება აქვს მხოლოდ იმ პრეტენდენტს, რომელმაც ძირითად დროში, დადგენილი წესით, წარადგინა შესყიდვის ელექტრონულ პროცედურის წინადადება. პირველ დამატებით რაუნდში შეთავაზების რიგითობა განისაზღვრება პრეტენდენტთა მიერ ძირითად დროში წარდგენილი წინადადების ფასების მიხედვით, კერძოდ, პირველ დამატებით რაუნდში პირველ შეთავაზებას აკეთებს ის პრეტენდენტი, რომელმაც ძირითად დროში ყველაზე მაღალი წინადადების ფასი დააფიქსირა, ხოლო ყოველ მომდევნო რაუნდში – ის პრეტენდენტი, რომელმაც წინა რაუნდში ყველაზე მაღალი წინადადების ფასი დააფიქსირა. წინადადების თანაბარი ფასების დაფიქსირების შემთხვევაში, რაუნდში პირველ შეთავაზებას აკეთებს ის პრეტენდენტი, რომელმაც ბოლომ დააფიქსირა ასეთი ფასი. დამატებით რაუნდებში მონაწილეობა სავალდებულო არ არის.

29. შესყიდვის ელექტრონულ პროცედურაში წინადადების ღირებულება (ერთეულის და საერთო ფასი) გამოსახული უნდა იყოს ეროვნულ ვალუტაში ლარში, საქართველოს კანონმდებლობით გათვალისწინებული შესყიდვის ობიექტის მიწოდებასთან დაკავშირებული ყველა გადასახადის და ხარჯების გათვალისწინებით მ.შ. დღე.

30. ხარჯები, რომლებიც წინადადების ფასში არ იქნება გათვალისწინებული, არ დაექვემდებარება ანაზღაურებას.

31. სისტემა ძირითად დროში უზრუნველყოფს პრეტენდენტების რაოდენობის, მათი ვინაობისა და შესყიდვის ელექტრონული პროცედურის წინადადებების ანონიმურობას. პრეტენდენტების რაოდენობა და წინადადების ფასები საჯარო ხდება დამატებითი რაუნდების დაწყების მომენტიდან. პრეტენდენტთა ვინაობა და ტექნიკური დოკუმენტაცია საჯარო ხდება შესყიდვის ელექტრონული პროცედურისათვის „წინადადებების მიღება დასრულებულია“ სტატუსის მინიჭებისთანავე.

32. შესყიდვის ელექტრონულ პროცედურაში წინადადების წარდგენით პრეტენდენტი ეთანხმება შესყიდვის ელექტრონული პროცედურის პირობებს.

33. ხელშეკრულების დასადებად მიწვევამდე, პრეტენდენტს უფლება აქვს, უარი თქვას შესყიდვის ელექტრონულ პროცედურაში წარდგენილ წინადადებაზე. შესყიდვის ელექტრონულ პროცედურაში წარდგენილ წინადადებაზე უარის თქმა იწვევს პრეტენდენტის ამ წესის 20-ე პუნქტის „ა“, „ე“ ან „ვ“ ქვეპუნქტებით დისკვალიფიკაციას და 25-ე პუნქტის შესაბამისად პრეტენდენტს არ უზრუნდება შესყიდვის ელექტრონულ პროცედურაში მონაწილეობის 1%-იანი საბანკო გარანტია.

34. ელექტრონულ პროცედურასთან დაკავშირებული ყველა დოკუმენტი ან/და ინფორმაცია წარმოდგენილ უნდა იქნეს ქართულ ენაზე. დოკუმენტების ან/და ინფორმაციის უცხოურ ენაზე წარდგენის შემთხვევაში, მათ უნდა დაერთოს ნოტარიულად დამოწმებული ქართული თარგმანი. დოკუმენტაციასთან დაკავშირებული სადავო საკითხების გადაწყვეტისას უცხოურენოვან დოკუმენტსა

და მის ქართულ ენაზე შესრულებულ თარგმანს შორის პრიორიტეტის მინიჭების საკითხს წყვეტს შემსყიდველი ორგანიზაცია.

35. სახელმწიფო შესყიდვების ერთიან ელექტრონულ სისტემაში (შემდგომში – სისტემა) ატვირთული ყველა დოკუმენტი ან/და ინფორმაცია ხელმოწერილი ან/და ბეჭედდასმული (ბეჭდის არსებობის შემთხვევაში) უნდა იყოს უფლებამოსილი პირის მიერ (საჭიროების შემთხვევაში ატვირთულ უნდა იქნას უფლებამოსილების დამადასტურებელი დოკუმენტი).

36. შესყიდვის ელექტრონულ პროცედურაში მონაწილეობის მისაღებად, პრეტენდენტს შეუძლია წარადგინოს წინადადება, წინადადების მიღების ვადის დაწყების ეტაპიდან წინადადების მიღების ვადის დასრულებამდე.

37. წინადადების წარდგენა შესაძლებელია მხოლოდ სისტემის მეშვეობით. პრეტენდენტის შეთავაზება, გარდა ტექნიკური დოკუმენტაციით მოთხოვნილი მასალისა, უნდა შეიცავდეს შესყიდვის ელექტრონული პროცედურის დოკუმენტაციით გათვალისწინებულ გარანტიას.

38. ელექტრონულ პროცედურის დოკუმენტაციით გათვალისწინებული დოკუმენტების ატვირთვის შემდგომ, პრეტენდენტმა სისტემის შესაბამის ველში უნდა მიუთითოს წინადადების ფასი, რომელიც არ უნდა აღემატებოდეს შესყიდვის ობიექტის სავარაუდო ღირებულებას. ტექნიკური დოკუმენტაციის ატვირთვისა და წინადადების ფასის მითითების შემდეგ, დაუშვებელია ატვირთული ტექნიკური დოკუმენტაციის შეცვლა, დამატება, გაუქმება ან წაშლა.

39. ხელშეკრულების ფორმა და ძირითადი პირობები მოცემულია შესყიდვის ელექტრონული პროცედურის დოკუმენტაციაში, რომელიც დაზუსტდება ხელშეკრულებების დადების მომენტისათვის.

40. პრეტენდენტის მიერ წარმოდგენილ წინადადებაში საერთო და ერთეულის ფასი გამოსახული უნდა იყოს საქართველოს კანონმდებლობით გათვალისწინებული და შესყიდვის ობიექტის მიწოდებასთან დაკავშირებული ყველა გადასახადის გათვალისწინებით. წინადადების საერთო და ერთეულის ფასის წარმოდგენა დასაშვებია მხოლოდ ლარში.

41. პრეტენდენტს არა აქვს უფლება წარმოადგინოს ალტერნატიული წინადადება

42. შემსყიდველებს წარმოადგენენ ა(ა)იპ „თბილისის საბავშვო ბაგა-ბაღების მართვის სააგენტო“-ს მიერ დაფუძნებული თბილისის საბავშვო ბაგა-ბაღები, ელექტრონული პროცედურის განმახორციელებელს წარმოადგენს ა(ა)იპ „თბილისის საბავშვო ბაგა-ბაღების მართვის სააგენტო“.

ელექტრონული პროცედურის დოკუმენტაციასთან დაკავშირებული განმარტებების მიღება პრეტენდენტს შეუძლია სისტემის მოდულის – „კითხვა/პასუხის“ მეშვეობით სახელმწიფო შესყიდვების სააგენტოს თავმჯდომარის 2017 წლის 14 ივნისის N12 ბრძანებით დამტკიცებული ელექტრონული ტენდერის ჩატარების წესის მე-6 მუხლის შესაბამისად ან/და ელექტრონული პროცედურის კომისიის აპარატის წევრისთვის მიმართვის გზით, მის: ქ. თბილისი, მიცკევიჩის ქუჩა №29-29ა, მე-3 სართული.